

Nuwe boeke

T. Coetzee en P.P.C. Nel. 1990. *Drennan se Menslike Osteologie*. Vyfde uitgawe.

Drennan se Menslike Osteologie is 'n redelik omvattende beskrywing van alle aspekte van menslike osteologie en word op sowel voor- as nagraadse vlak gebruik.

Die oorspronklike werk van prof. M.R. Drennan was sedert die eerste uitgawe, wat as *A Short Course on Human Osteology* in 1928 verskyn het, 'n staatmaker in die bestudering van osteologie. Die boekie is later deur prof. Theunis Coetzee in Afrikaans vertaal en het as die vierde uitgawe verskyn. 'n Tekortkoming wat nog altyd bestaan het, was die onbenoemde en oorvereenvoudigde illustrasies.

Met die vyfde uitgawe, hersien deur Coetzee en Nel, is die illustrasies verbeter, van byskrifte voorsien en binne die teks geplaas. Sekere afdelings, byvoorbeeld dié wat handel oor die tande, is uitgebrei en behoort byval by die voorgraadse tandheelkundige studente te vind. Verder is veranderinge en byvoegings aan die teks aangebring en aanpassings wat betref die nuutste terminologie is gemaak.

Hierdie boek het oor die laaste ses dekades altyd in aanvraag gebly en met die nuutste uitgawe, wat by hierdie tradisie gevoeg is, is verseker dat die boek sy plek in osteologieopleiding vir die toekoms sal behou.

J.H. MEIRING

Toekomstige byeenkomste

- 'n Internasionale simposium met die tema *Transport and Communications in Africa* word van 27 tot 29 November 1991 in Brussel, België gehou. Navrae: Royal Academy of Overseas Sciences, Rue Defacqz 1 bte 3, B-1050 Brussels, Belgium. Tel. +32/2/538.02.11, faks +32/2/539.23.53.
- Die Suid-Afrikaanse Akademie vir Wetenskap en Kuns se algemene jaarvergadering word volgende jaar van 17 tot 19 Junie by die Potchefstroomse Universiteit vir CHO gehou. Volledige besonderhede sal later bekend gemaak word.

ERRATUM

SA Tydskrif vir Natuurwetenskap en Tegnologie, Maart 1991, bl. 35, 1ste kolom, 10de reël:

Voeg „/“ in na 0,6

Voorskrifte by die voorbereiding van figure*

Alle illustrasies, hetsy lyntekeninge, grafieke of fotografiese reproduksies, word *figure** genoem. Die benaderde posisie van figure in die teks moet aangedui word.

Een stel oorspronklike figure of glansfoto's en drie stelle kopieë moet voorgelê word. Die figuurnommer en die naam van die outeur of eerste outeur moet agterop elkeen van die figure aangedui word. Daar moet ook agterop elkeen van die figure aangedui word watter kant van die figuur bo moet wees deur 'n pyltjie te teken en daarby die woord "bo" aan te bring.

Figure wat van lyntekeninge gebruik maak, moet met lyndiktes van minstens 0,7 mm op A4 wit papier van goeie gehalte geteken word. Die tekening moet die hele A4-vel met 'n kantlyn van minstens 40 mm aan alle kante van die tekening vul. In die geval van grafieke moet die lyndiktes van die asse 0,35 mm wees sodat die krommes met 0,7 mm lyndikte duidelik uitstaan. Die asse van die grafiek moet op geskikte intervalle afgemerk wees. Die merkies moet na binne wys, 0,25 mm dik wees en buite geannoteer word. Roosterlyne (0,25 mm dik) moet vermy word behalwe waar noukeurige afmetings op die krommes nodig is. Hoofletters wat by A4-lyntekeninge gebruik word, moet ten minste

5 mm hoog wees en die klein letters moet bypassend wees.


Daar moet baie duidelik onderskei word tussen die verskillende krommes wat op 'n grafiek aangebring word deur òf syfers, letters of simbole (sirkels, driehoekies, kruisies, ens.) op die lyne aan te bring, òf van verskillende lyntipes (soliede, stippellyne, stippelpuntlyne ens.) gebruik te maak. Die betekenis van die simbole of lyntipes moet indien nodig in die onderskrif verduidelik word.

Die beskrywing van die asse van grafieke moet buite wees en moet, waar toepaslik, bestaan uit 'n woord (bv. versnelling), 'n simbool (bv. a) en 'n eenheid (bv. ms^{-2}). By-skrifte moet parallel met die asse wees.

Foto's moet in so 'n grootte voorsien word dat dit regstreeks afgedruk kan word. Die wydte moet hoogstens òf 160 mm (bladsywydte) òf 80 mm (kolomwydte) wees. In elk geval moet die foto's so klein as moontlik wees sonder om detail te verloor.

Lynfigure sowel as foto's moet voorsien wees van 'n onderskrif wat op 'n afsonderlike vel getik word, met verwysing na die figuurnommers wat agterop die oorspronklike figuur aangedui is.

(Sien bygaande voorbeeld.)



Voorbeeld van 'n lynfiguur.